

Pita ndê bapia tilu-nga Yom whê bapia dindéc sa-nga

Pita to ndê bapia tilu-nga hêganônɔ lau sêkêɔ whiɔ-nga naɔ sêmbô babalip yêc nom ɔgamenɔ tidau-tidau. Inɔ to bu kêɔ puc ɔac pi kêdôhônɔwaga tasanɔ daêsam naɔ sêhônɔ asê. Lau dau sêndôhônɔ lau bu Yisu oc mbu meɔ dom, ma sêsôm bu mêtê sac inɔ mêtê ɔayham.

Pita po lau sêkêɔ whiɔ-nga sa tu ɔac si lêɔ ti sakiɔ-nga ma kêgilí ɔac bu sêlhac ɔanga tu Yisu-nga. Inɔ whê sa bu Yisu mbu meɔ ɔagahô dom, ɔahu bu Anötô atac whiɔ bu lau hon sênem dau kwi, ma sêtap Anötô ndê mwasiɔ nem ɔac si-nga sa, dec tiɔambu Yisu oc mbu meɔ. Ma inɔ kêɔ puc lau pi ɔagêyô sac naɔ gic waê kêdôhônɔwaga tasanɔ, ma pi lau hon naɔ sêtec yom ɔandô ma sêsap mêtê sac dôɔ.

Pita gic hu ndê bapia tilu-nga

¹ Aô Saimon Pita, Yisu Kilisi ndê aposel ti ndê ɔgac akiɔ, gato bapia dindéc têɔ mac lau naɔ akêɔ whiɔ inɔ. Anötô kêmwasiɔ mac awhiɔ yac ɔa mwasiɔ ɔayham kêlêc, dec dati lau dakêɔ whiɔ-nga. Ma yac dakêɔ whiɔ bocdec bu, Anötô gêlic yac datôm lau gitêɔ tu Yisu Kilisi, yac neɔ Anötô ma ɔgac Gêm Yac Si-nga, naɔ ndê lêɔ gitêɔ-nga. ² Yac atenɔ mbec bu Anötô kêɔ gauc têɔ mac bu aɔyalê inɔlu yac neɔ Pômdau Yisu

Kilisi, e inlu si mwasin ti yom malô ênsalê mac ahuc.

Anötö ndê kêyalin ti kêgalêm yac sa ña-ñandô

³ Anötö kêgalêm yac sa, ñahu sip in dau ndê ñawasi atu ti ndê mêtê gitên. Ma in kêmwasin yac ña in dau ndê ñaclai atu, dec puc yac dôn bu dambo tanli ti datoc in sa ñapep ña yac neñ lên hoñ. Ma yac datôm bu dakôm bocdinañ, ñahu bu in ndê ñaclai gêm yac sa bu tanyalê in tidôn.

⁴ Ma tu in dau ndê ñawasi ti mêtê gitên-nga, dec in gic bata bu kên mwasin atu ma ñayham kêléc tên yac. Ma mwasin dau oc kôm gwelen yêc yac neñ ñalôm, tu bu nem yac kwi-nga e dasa neñ lên gitên ti dabuñ eñ ma datôm in dau, ma dalhõ su yêc lên dandinan-nga nan gic waê lau nan sêsap mêtê ñalôm ñagalac-nga dôn.

⁵ Tu yom hoñ dinañ-nga dec ayob daôm ñapep bu mac nem akên whin ti gên ñandô mbasi-nga dom. Asa nem lên akên whin-nga ti nem ñalôm sambuc, ma asap mêtê ñayham dôn. Ma ati lau tigauc tu lên ñayham bu asa-nga.

⁶ Atimêtê daôm ñapep, ma alhac ñanga eñ. Asa nem lên hoñ ñapep eñ, tu bu atoc asê bu mac atoc Anötö sa. ⁷ Ma asap mêtê atac whin nem asidôwai-nga dôn e andic dabin nem lên atac whin lau hoñ-nga. Ñalên dinañ dec mac nem akên whin oc ti gên ñandô mbasi-nga dom.

⁸ Mêtê hoñ dinañ bu ênsôwec tiatu-tiatu ñapan e tidôn mac ñandô, dec mac nem gauc anyalê yac neñ Pômdau Yisu Kilisi-nga oc ti gên ñambwa ma ñandô mbasi-nga dom. ⁹ Bu asa nan sôm bu

in̄ k̄yalê Pômdau, magoc kôm mêtê ñayham-ñayham dinañ dom, nañ gitôm ñamalac tandô pec nañ gêlic gameñ dom, ma in̄ kêlhin̄ sin̄ bu sac hoñ nañ in̄ kôm muñ-nga, nañ Anötö suc kwi su ma kêgwasin̄ in̄ ndê ñalôm ñawasi sa.

¹⁰ Tu dinañ-nga aneñ asidôwai, añsahê ñaŋga bu asap mêtê ñayham hoñ dinañ dôñ, tu bu tôc asê bu Anötö k̄yalin̄ ti k̄galêm mac sa ñambwa lec dom. Ñahu bu mac bu asap mêtê dau dôñ, dec oc tôm dom bu mac apeñ. ¹¹ Ma bocdinañ Anötö oc kôc mac sa atôm lau ti waê atu, bu ambo gameñ nañ yac neñ Pômdau ti Ngac Gêm Yac Si-nga Yisu Kilisi gêm gôlin̄, nañ oc yêc ñapañ.

Pita tec bu sêñhin̄ yom ñandô sin̄

¹² Tu dinañ-nga dec aö bu wakêñ puc mac bu gauc nem yom hoñ dinañ ñapañ. Aö kayalê bu mac akôc yom ñandô sa ma añyalê tidôñ su. ¹³ Magoc aö galic ñayham bu wakêñ puc mac tôm aneñ têm wambo tañli-nga hoñ bu añlhin̄ yom dau sin̄ dom. ¹⁴ Bu Pômdau Yisu Kilisi hoc asê têtj aö bu aneñ têm wahu nom dindec sin̄-nga meñ kêpin̄ su. ¹⁵ Bocdinañ kwahic dec aö tac whin̄ ñandô bu mac añyalê yom hoñ dindec tidôñ sambuc yêc nem ñalôm, bu têtj ndoc aö bu wahu mac sin̄, nañ mac oc gauc nem yom dindec ñapañ, ma akôm ñandô sa.

Pita puc lau aposel ti propet si yom dôñ bu yom ñandô

¹⁶ Yom nañ yac lau aposel ahoc asê têtj mac pi Pômdau Yisu Kilisi ndê ñaclai ti ndê bêc mbu meñ-nga, nañ ñahu sip yom ñambwa nañ

ɲamalac gauc kê dom. Mba. Yac dauɲ alic iɲ ndê ɲaclai ti ɲawasi atu su. ¹⁷⁻¹⁸ Bu yac ambo awhiɲ Kilisi yêc lôc dabuɲ, ma aɲgô iɲ Damba Anötö ɲawasi ɲadau ndê awha naɲ sa akêɲ undambê. Anötö dau toc Kilisi sa, ma po iɲ ndê waê sa têtɲ ndoc iɲ sôm yom pi iɲ bocdec bu, “Aö neɲ atuɲgac dau dindec. Aö galic iɲ ɲayham, ma atac whiɲ iɲ ndu andô.”

¹⁹ Gêɲ hoɲ naɲ yac alic ti aɲgô, naɲ puɲ yom naɲ propet akwa-kwa sêhoc asê ti sêto muɲ su, naɲ dôɲ têtɲ yac. Bocdinaɲ atôc gwaniɲ yom dau ɲapep, bu whê nem gauc sa pi yom ɲandô, gitôm ya ɲawê naɲ pô gameɲ ɲasec. Ma asap yom dau dôɲ e Kilisi mbu meɲ, ma tôte gêɲ hoɲ tiawê têtɲ mac, gitôm Têtênda bêbêc-ɲga pi meɲ ma bêc wakuc meɲ sa. ²⁰ Ma aɲyalê gêɲ atu daɲ bocdec bu, yom hoɲ naɲ Anötö ndê propet sêto, naɲ ɲadaɲ ɲahu yêc ɲac dau-ɲga dom. ²¹ Bu yom naɲ propet sêhoc asê, naɲ ɲahu yêc ɲamalac dom, magoc sêhoc Anötö dau ndê gauc ti yom asê tôm ɲalau Dabuɲ kac ɲac.

2

Kêdôhônwaga tasan oc sêmen

¹ Magoc propet tasan sêmbô lau Israel-ɲga ɲalôm, sêwhiɲ Anötö ndê propet ɲandô, ma ɲalêɲ tigen ɲêdôhônwaga tasan oc sêtisa yêc mac lau akêɲ whiɲ-ɲga nem toɲ ɲalôm bocdinaɲ. ɲac oc sêɲsau bu sêndôhôn yom ɲandô, magoc yom dau iɲ yom tasan, ma gitôm bu tim lau e sêniɲga gacgen. Yom ɲandô pi Pômdau naɲ gêmlihi ɲac su, naɲ ɲac oc sêsêc ahuc, ma

bocdinaŋ dec têt bêt ɲambu-ŋga, Anötö oc tin ɲac su sêniŋga ɲagahô eŋ. ² ɲac oc sêtim lau daêsam naŋ sêkêŋ whiŋ gwalec, e sêŋkuc ɲac ma sêkôm mêtê mayan-ŋga tidau-tidau tôm ɲac dau sêkôm. Ma tu ɲac si lêŋ dinaŋ-ŋga, dec lau ɲatô oc sêpu yac lau dakêŋ whiŋ-ŋga neŋ lêŋ yom ɲandô-ŋga. ³ ɲac lau atac whiŋ mone-ŋga, dec ɲac oc gauc kê miŋ tu sêndôhôn mac-ŋga, ma sêmbac-sêmbac yom mac bu anemlhi ɲac. Magoc yom matôc-ŋga naŋ Anötö kêmatin tidôn muŋ su tu sêniŋga-ŋga, naŋ hôŋ ɲac gitôm ɲacyo naŋ yêt bêt dom, magoc gêm neneŋ ɲac mbo.

Lau sac oc sêwê Anötö ndê matôc sa dom

⁴ Akôc gauc pi yom dindec. Aŋela naŋ sêkôm sac, naŋ Anötö hu ɲac si yom siŋ dom, magoc kêŋ ɲac sêndôc gapocwalô lambwam-ŋga, bu sêndôc ɲasec ɲalôm e tôm bêt matôc-ŋga hóc asê. ⁵ Ma lau naŋ sêkôm sac têt têm ɲamata-ŋga, naŋ Anötö hu ɲac si yom siŋ dom bocdinaŋ. Mba. In kêŋ bu suŋ atu ma seŋ lau sac hoŋ su siŋga, magoc Noa naŋ têt lêŋ gitêŋ ti ndê gôlôwac ⁷, naŋ Anötö gêm ɲac sa. ⁶ Ma gauc nem malac atu Sodom ma Gomora ti lau hoŋ naŋ sêndôc dinaŋ, naŋ Anötö kêŋ ya gêŋ su e ɲadaê ɲambwa yêt. Gêŋ dau tôm dôhôn pi gêŋ naŋ lau naŋ sêsap mêtê sac dôŋ, naŋ oc sêtap sa têt bêt ɲambu-ŋga. ⁷ Têt ndoc dinaŋ Anötö kêgaho Lot su yêt malac Sodom, bu in ɲgac gitêŋ naŋ ɲalôm ɲawapac ɲandô tu lau sac malac dinaŋ-ŋga si mêtê ɲadômbwi tidau-tidau-ŋga. ⁸ Yomandô. Lot in ɲgac gitêŋ ma ndê ɲalôm ɲawasi. Ma

mêtê sac naŋ inŋ ngô ti gêlic yêc malac dinaŋ tòm bêc hoŋ, naŋ kêŋ wapac inŋ ndê ŋalôm. ⁹ Yom hoŋ dinaŋ tôc asê bu lau naŋ sêsap Anötö ti ndê lêŋ dôŋ, naŋ Pômdau gitôm bu nem ŋac si yêc ŋawapac ti saê naŋ tap ŋac sa. Ma inŋ gitôm bu hê lau sac si yom dôŋ e inŋ kêŋ ŋagêyô têŋ ŋac têŋ bêc ŋambu-ŋga. ¹⁰ Ma inŋ oc kêŋ ŋagêyô sac sambuc têŋ lau naŋ sêŋkuc mêtê ŋalôm akwa-ŋga naŋ kôm ŋac ŋadômbwi sa yêc inŋ aŋgô-ŋga, ma sêtec bu sêsôc Pômdau me lau daŋ ŋapu.

Kêdôhônwaga tasanŋ si lêŋ

Kêdôhônwaga tasanŋ naŋ sêmbo sêwhinŋ mac, naŋ sêtoc dau sa ma sêkôm gêŋ hoŋ yêc lau aŋgô-ŋga ti maya pac. Ŋac sêtoc dau dom tu sêsôm yom sac-sac pi Anötö ndê lau ti ŋawasi.* ¹¹ Anötö dau ndê aŋela naŋ si ŋaclai ti ŋaŋga hôc gêlêc ŋac lau dau si su, naŋ sêŋgôlinŋ yom me sêsôm yom sac daŋ pi lau ti ŋawasi yêc Pômdau aŋgô-ŋga dom. ¹² Magoc kêdôhônwaga tasanŋ dinaŋ sêsôm yom sac-sac daêsam pi Anötö ndê gêŋ naŋ sêŋyalê ŋahu dom. Ŋac sêtôm bôclai naŋ sêŋyalê lêŋ malô ti gauc ŋayham daŋ dom, naŋ lau sêlô sip huc ma sic ndu. Ma tòm bôclai sic waê bu sêniŋga, dec kêdôhônwaga tasanŋ dinaŋ oc sêniŋga bocdinaŋ.

¹³ Anötö oc kêŋ ŋagêyô sac têŋ ŋac ô sac naŋ sêkôm têŋ lau. Ŋac atac whinŋ mêtê sênôm ti sênenŋ asam-ŋga, ma maya mbasi dec sêkôm têŋ

* **2:10** Lau ti ŋawasi - yêc ndê bapia, Pita to yom tigenŋ naŋ 'ŋawasi.' Lau ŋatô gauc gêm bu yom dau hêganônŋ aŋela, magoc lau ŋatô gauc gêm bu yom dau hêganônŋ lau sêkêŋ whinŋ-ŋga, me lau sêkêŋ whinŋ-ŋga si lau bata.

acsalô eŋ. Têŋ ndoc sêndöc ti seŋ gêŋ sêwhiŋ mac, naŋ sêhu si mêtê sac siŋ daŋ dom, ma bocdinaŋ sêkôm mac nem waêm ŋayham tisac. ¹⁴ Ŋac lau tagatu mockaiŋ-ŋga, naŋ si ŋalôm ti gauc sap mêtê sac döŋ ŋapaŋ. Ŋac sêtim lau naŋ si sêkêŋ whiŋ babalê, ma sêhê ŋac bu sêkôm sac sêwhiŋ ŋac. Ma ŋac lau gwalam akwa tu tagatu lau si gêŋ-ŋga. Bocdinaŋ dec sic waê bu sêtap Anötö ndê atac ŋandê sa. ¹⁵ Ŋac sêhu lêŋ solop siŋ gacgeŋ, ma sêŋkuc Beo atuŋgac Balam ndê lêŋ. Ŋgac dau atac whiŋ mone hôc gêlêc, dec kôm sac tu tap awa sa-ŋga. ¹⁶ Ma tu iŋ ndê lêŋ dinaŋ-ŋga dec Anötö kêŋ doŋki daŋ sôm iŋ. Doŋki dau iŋ gêŋ sôm yom-ŋga dom, tigeŋ Anötö kôm iŋ sôm yom tôm ŋamalac, bu lhac propet dau ndê lêŋ gauc mbasi-ŋga ahuc.

¹⁷ Lau dinaŋ sêtôm bubata naŋ tibasô ma yawalec naŋ mbu oc soc su niŋga ŋagahô eŋ. Anötö kêmasaŋ gameŋ ŋasec atu daŋ tu ŋac sêndöc-ŋga. ¹⁸ Ŋac sêsôm yom ŋambwa-ŋambwa tu sêtoc dau sa-ŋga. Ma sêŋsahê bu sêtim lau sêkêŋ whiŋ-ŋga wakuc bu sêmbu sêtêŋ lêŋ sac-ŋga naŋ ŋasawa apê eŋ sêhu siŋ su, naŋ sêndi. Ŋac sêŋgilí lau kaiŋ dinaŋ bu sêsa lêŋ ŋalôm ŋagalac-ŋga, naŋ meŋ akêŋ ŋalôm akwa. ¹⁹ Ŋac sêndôhôn lau dau bu yao daŋ yêc dom, dec sêtôm bu sêkôm gêŋ tôm si atac whiŋ. Magoc ŋac dau ŋac lau akiŋ ŋambwa ma mêtê sac ti ŋac si ŋadau. Tôm mac anyalê su, gêŋ sake naŋ ndê ŋaclai gêm gôliŋ yac, naŋ ti yac neŋ ŋadau ma tam akiŋ iŋ. Tu mêtê sac dinaŋ-ŋga, dec sic waê bu sêniŋga.

²⁰ Bu lau nañ sênyalê yac neñ Pômdau ma Ngac Gêm Yac Si-nga Yisu Kilisi, nañ sêhu lêt sêninga-nga siñ su. Magoc ñac bu sêmbu sêtêñ lêt sac-nga dau tiyham, goc mêtê sac ku ñac dulu. Ñac sêkôm dandi sêtisac sambuc, hôc gêlêc ñamata-nga su. ²¹ Ñac bu sênyalê lêt gitêñ dañ su dom, nañ oc ñayham hôc gêlêc sênyalê su ma sêhu siñ, ma sêpuc dômbwê Pômdau ndê yomsu dabuñ nañ aposel sic dulu têt ñac. ²² Gauc nem yom gôliñ lu nañ lau sêsôm bocdec bu, “Giam dañ guluc ma kac dau kwi gi gêt tiyham,” ma “Bôc nañ sêngwasin ñawasi sa, nañ mbu gi gic matob tiyham.” Yom gôliñ lu dinañ hêganôn lau tasan dinañ solop. Ñahu bu sênyalê Pômdau su, magoc sêmbu sêtêñ lêt sac-nga tiyham.

3

Pômdau ndê bêc mbu meñ-nga

¹ O aneñ lau atac whiñ-nga, kwahic dec aô gato bapia tilu-nga têt mac. Bapia lu-lu bu sêpuc yom ñandô nañ akôc sa su, nañ dôñ yêc nem gauc ñapan, ma bu êngilí mac bu akôc gauc ñayham eñ. ² Aô tac whiñ bu mac akôc gauc tiyham pi yom nañ propet dabuñ sêhoc asê muñ su, ma pi yom nañ yac neñ Pômdau ma Ngac Gêm Yac Si-nga gic atu ma kêñ têt lau aposel bu sêndic dulu têt lau.

³ Gêt atu nañ aô bu wakêñ puc mac pi, nañ bocdec bu. Gauc nem bu têt têt ñambu-nga lau oc sêmeñ nañ sêkôm gêt hon têt ñac dau si atac whiñ, ma sêsu mac susu ma sêpu Anötö ndê lêt.

⁴ Nac oc sêsôm, “Yisu sôm bu oc mbu meŋ ma kôm gêŋ hoŋ tiwakuc, a? Inj mbo nde? Têŋ ndoc damaŋi sêmbac ndu ma meŋ têŋ kwahic dec, naŋ dalic bu gêŋ daŋ tiwakuc dom, ma gêŋ hoŋ yêc tôm têm ŋamata-ŋga andô, têŋ ndoc nom ti gêŋ hoŋ sêhôt asê ma kêselêŋ meŋ.” ⁵ Lau naŋ sêsôm yom kainj dinaŋ, sêsêc Anötö ndê ŋaclai, naŋ sêŋyalê su, naŋ ahuc. Bu ŋac sêŋyalê su bu wandêc daŋ su Anötö sôm yom ŋa whaŋsuŋ ŋambwa ma undambê hôt asê, ma inj sôm bu bu lêc dau sa ndi poc dau-ŋga, e gameŋ tibasô yêc bu ŋasawa. ⁶ Ma tiŋambu inj kêŋ bu dau dinaŋ suŋ e seŋ nom ti gêŋ hoŋ su siŋga. ⁷ Ma Anötö kêmatinj yom tidôŋ whinj, bu ya oc neŋ undambê ti nom kwahic dec-ŋga su, têŋ bêc naŋ inj oc êmatôt lau hoŋ, ma seŋ lau sac su sêŋiŋga.

⁸ O aneŋ lau atac whinj-ŋga. Anlhiŋ siŋ dom bu Pômdau gêlic bêc tigeŋ gitôm yala 1,000, ma yala 1,000 gitôm bêc tigeŋ. ⁹ Lau ŋatô sêlic bu Pômdau mbu meŋ ŋagahô dom, dec sêkôt gauc so ma sêsôm bu yom ŋatô naŋ inj gic bata su, naŋ inj oc kôm ŋandô sa ŋagahô dom. Magoc mba. Inj kôt ndê ŋalôm dôŋ tu mac-ŋga, ŋahu bu inj tec bu lau daŋ sêŋiŋga, magoc tac whinj bu lau hoŋ sênem si ŋalôm kwi ma sêhu sac siŋ. Tu dinaŋ-ŋga dec inj mbu meŋ ŋagahô dom.

¹⁰ Magoc Pômdau ndê bêc mbu meŋ-ŋga oc hôt asê ŋapuc mbasi tôm lau kaŋ si ndoc sêmeŋ-ŋga. Undambê oc hê su ti ŋakêcsia atu, ma ya oc neŋ nom ti gêŋ hoŋ naŋ yêc nom ti umbonj ŋapu, naŋ su sêŋiŋga. ¹¹ Akôt gauc ŋapep. Gêŋ hoŋ oc sêŋiŋga ŋalêŋ dinaŋ, ma bocdinaŋ dec

mac gauc gêm bu lêng bocke solop gic waê yac lau dakêñ whiñ-nga bu tañkuc? Solop bu mac asa lêng dabuñ, ma akôm mêtê nañ Anötö tac whiñ eñ. ¹² Ahôn Anötö ndê bêc nambu-nga ti añkuc lêng bocdinañ, ma akôm gêng hoñ tu bu bêc dau hóc asê ñagahô-nga.* Têñ bêc dinañ ya oc neñ gêng undambê-nga ti gêng nom-nga hoñ su. ¹³ Magoc Pômdau gic bata nom ti undambê wakuc têñ yac, nañ oc ti lau gitêñ si gameñ sêmbo-nga. Kwahic dec yac tañkwê bu dambo dinañ, ma dahôn bu gêng dau hóc asê.

¹⁴ Aneñ lau atac whiñ-nga, mac akêñ batam gêng dau ambo, ma tu dinañ-nga dec akêñ nem ñalôm sambuc bu asa nem lêng hoñ gitêñ eñ, e bêc nambu-nga hóc asê. Ma bocdinañ dec Pômdau oc tap giso dañ sa yêc mac-nga dom. Inj oc lic bu mac nem lêng hoñ ñawasi, ma mac oc atôm bu ambo inj añgô-nga ti yom malô. ¹⁵ Añyalê bu Pômdau gic têku inj ndê têm mbu meñ-nga ma kôc ndê ñalôm dôn, tu bu kên ñasawa têñ lau daêsam bu sênem dau kwi ma sêtap inj ndê mwasin nem ñac si-nga sa. Anötö kên gauc ñayham têñ yac neñ asidôwa atac whiñ-nga Pol, dec inj to yom kain tigen têñ mac. ¹⁶ Yêc inj ndê bapia hoñ inj to yom pi gêng hoñ

* **3:12** Yêc ñabatinj 9 Pita sôm bu Pômdau gic têku inj ndê têm tu mbu meñ-nga bu kên ñasawa têñ lau bu sêkac si ñalôm kwi. Ma yêc Mat 24:14 Yisu sôm bu bêc nambu-nga oc hóc asê dom e ñawaê ñayham nem nom ñagameñ hoñ ahuc. Pita gêm la lau dau bu sêsa lêng gitêñ eñ, tu bu lau sêlic ma sêkên whiñ Yisu-nga. Yac dakôm bocdinañ, ma datenj mbec ti dapuc gwelenj ñawaê ñayham-nga dôn, dec bêc nambu-nga dau oc hóc asê ñagahô.

dindec. Yom ɲatô naɲ iɲ to sip ndê bapia, naɲ ɲahu sip ɲalôm gi, ma lau gauc babalê naɲ sêkêɲ whiɲ gwalec, naɲ sêɲsôɲ Pol ndê yom ɲatô ma sêɲsôɲ Anötö ndê yom naɲ sêto yêc, naɲ ɲatô bocdinaɲ. Tu ɲac si lêɲ dinaɲ-ɲga dec ɲac oc sêɲiɲga.

¹⁷ O aneɲ lau atac whiɲ-ɲga naɲ asap Kilisi dôɲ ambo. Aö gakêɲ puc mac gwanaɲ su, ma bocdinaɲ dec ayob daôm ɲapep bu lau naɲ sêsôc Anötö ndê yom ɲapu dom, naɲ sêɲsôɲ mac, me sêkac mac su yêc Kilisi dom. ¹⁸ Asap yac neɲ Pômdau ma Ngac Gêm Yac Si-ɲga Yisu Kilisi ndê mwasiɲ dôɲ, bu nem ɲandô daêsam yêc mac nem ɲalôm, ma mac nem gauc aɲyalê iɲ-ɲga êɲsôwec tiatu-tiatu ndi e ati gwalam akwa akêɲ whiɲ-ɲga. Datoc iɲ ndê waê sa kwahic dec ma tôm bêc sambob. Yomandô.

Anötö ndê Yom Lêñsêm Wakuc
Bugawac: Anötö ndê Yom Lêñsêm Wakuc New
Testament

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 29 Sep 2022 from source
files dated 17 May 2022

1dcc5a6c-3c1e-54e8-aa77-af18a3782048